

Bhaluwa ja a Pauli ku Bhakoloshai Shilongolelo

Tukakumumanya ukoto ga shilambo sha Koloshai na mmbali kushaliji. Ikabheje puimanyika kuti kushaliji mwanja gwa malinga kilomita 175 kopoka ku Epesho, munkoa gwa Shiloma gwa Kuashia, mmbali ja kuliwila lyubha. Shilambo sha Koloshai shatendaga shuma kwa nema na mbwani, ikabheje tandubhila shaka sha 61 Bhakabhelekweje a Kilishitu (BK), kukakoposheleje nng'ungumilo nkulu gwa shilambo, kushuma kwa nema na mbwani kwa Kuepesho kukutandubhaga kupolobha, numbe tome na kuwa.

A Pauli papagwinji bhatendaga pita tome na kweneko, pubhajendaga mmbali ja ku Pulugia (Itendi 16:6, 18:23). Ikabheje puibhoneka kuti a Pauli bhangaika shene shilambosho.

A Epapula bhashilambo bha ku Koloshai ni bhalungwiye Ngani ja Mmbone jene mmbalijo (4:12), na bhanatolelwā kuti ni bhakumbwiye likanisha lya ku Koloshai. A ntume a Pauli bhanakwaalugula kwa mena ga mmbone malinga, “Bhakamula maengo ajangu bhutupingana,” (1:7, Pilimoni, 1:23) na bhanakwaakundikanya mmikumbi jibhili ja Shkilishitu. Gwa Laodikia na Ielapolli (2:1, 4:13, 15-16, Nng'ibhulo 1:11, 3:14-22). Bhakilishitu bha ku Koloshai, bhakalinginjiji Bhayaudi.

A Pauli bhangaaowelanga bhakilishitu bha ku Koloshai, ikabhe bhashinkwaatumanga bhakamula maengo ajabhonji, munkumbimo bhaapali a Epapula bhaliji bhashilambo bha ku Koloshai. A Tukiko ni bhaalugulwa kuti bhapeleshe jene bhaluwaji.

A Pauli bhalji nkutabhwa gubhaposhele ntenga kwa a Epapula, kuti Bhakilishitu bha ku Koloshai bhatendaga puganywanga na majiganyo gana, ga kuti mundu apinga kwaamanya a Nnungu na tapulwa, anapinjikwa atindibhalile ashimalaika na kunda shalia ja a Musha, malinga ga jaluka na yalya ina analye.

Bhai a Pauli gubhaajandishelenje nkwaakumbushiyanga kuti, ntapulo gubhapatilenje na a Nnungu nkulundana na a Yesu Kilishitu, ni shindu ukoto, na bhanapinjikwanga kagulila majiganyo ga a Yeshupe, bhaali bhakulungwa bha mashili gowe gaabhoneka na gakaabhoneka, na bhenebho ni a kalongolele bhakulu bha likanisha.

Jene bhaluwaji jinamanyika kaje kwa lylimbo lwake lwaluupi, ikabheje jinakomelesheya nkwainiya a Yesu na liengo lyabho (1:15-20).

Ndumbililo ja jene bhaluwaji jangaishika kwa gali nkatimo. Bhandunji bhana bhatendaga kwaajiganyanga Bhakoloshai majiganyo ga kanana na ntenga gwa Ngani ja Mmbone ja a Kilishitu. Gene majiganyo ga unamigo pugashemwaga, lumanyio (2:8). Gene majiganyogo gakuti, pa shilambolyo ipali mbumu ipinjikwa kulupalilwa na kuishimiwa (2:8, 20, 1:16, 2:10,

15) nneila peila shalia ina ga yalya (2:16, 20-21) na mobha gana ga shikukuu (2:16b) kuti ganapinjikwa gaishimiwe.

Shipande shikulungwa sha pakati jene bhaluwaji shinakomboleka kugabhanya ipande itatu, kutandubhila shilongolelo eu malobhe ga tandubhila (1:1-8) ni malishiya na ng'aniyo yabho bhayene, na shalamu (4:7-18).

Ipali Mwenemo

1. Kundandubho (1:9-23), a Pauli bhanakwaa-tendela eja a Nnungu kwa ngulupai na kulupalila kwa ashaalongo ajabho bhalingiji ku Koloshai.
2. Kabhili (1:24-25), a Pauli bhanakungu-lushila ga liengo lyabho lya utume, na mi-ungu jabho ja Ngani ja Mmbone ku bhandu bhangabha Bhayaudi, nkwaatalashiyanga ga mpango gwa a Nnungu umanyishe mwa a Kilishitu, bhali ngulupai ja bhowe bhak-waakulupalilanga.
3. Kumpelebhesheyo (2:6-4:6), a Pauli bhanaji-ganya nkukomelesheya ga Ngani ja Mmbone ja nema. Na kuti, mwa a Kilishitu, ni mukuli kamilika kowe kwa a Nnungu (2:9).

¹ Jene bhaluwa jino kujikopoka kwangu nne a Pauli ntume na apwetu a Timoteo. Njishemwa na a Nnungu kwa pinga kwabho kubha ntume jwa a Yesu Kilishitu.

² Tunakunjandishilanga mmandunji bha ukon-jelo nninginji ku Koloshai, mmakulupalikanga nnundenenje na a Kilishitu. Nema na ulele

ibhakutupa a Atati a Nnungu, ibhe na mman-ganyanji.

Kutenda Eja na Juga

³ Kila putukunnujilanga, tunakwaatendela eja a Nnungu, Aina bhabho Bhakulungwa bhetu a Yesu Kilishitu. ⁴ Pabha tushipilikana ngani ja ngulupai yenunji nkulundana na a Yesu Kilishitu, na nkwaapinganga bhandu bhowe bha ukonjelo. ⁵ Kwa ligongo lya ngulupalilo ya indu immishilwenje kunnungu, numbe ngani jakwe mwapilikenenje bhukala kwa lilobhe lya kweli limwalungushiwenje, yani, Ngani ja Mmbone.

⁶ Ngani ja Mmbone jinapunda peleshela mboka na shuma pashilambolyo, malinga shiili kunngwenunji kutandubhila lyubha limwapi-likenenje na kujimanya nema ja a Nnungu shijili ja kweli. ⁷ Malinga shinnjigenywenje ga nema ja a Nnungu na a Epapula, bhatumishi ajetu bha a Kilishitu bhaakulupalika, kwa ligongo lyenu mmanganyanji. ⁸ Bhenebho bhatubhalanjile ga pinga kwenunji kumpatilenje naka Mbamu.

⁹ Kwa lyene ligongolyo, numbe uwe tukapi-likaneje tukaaleka kunnujilanga kwa a Nnungu, nkupinga bhampanganje lunda na lumanyio lwa muntima. ¹⁰ Penepo shinkombolanje tama malinga shibhapinga Bhakulungwa a Nnungu, nitenda yowe ikwaanonyela, ndamo jenunji shi-jipunde peleshela mboka ya kila namuna kwa itendi ya mmbone na shimpundanje kwaamanya a Nnungu.

¹¹ A Nnungu bhampanganje mashili kwa kom-bola kwabho kwa ukonjelo, nkupinga mwiip-ilililanje kwa kila shindu na kwiiluma na angalala. ¹² Mwaatendelanje eja Atati a Nnungu, bhantendilenje nkombolanje poshela miadi ja indu ibhaabbishilenje bhandunji bha ukonjelo, muupalume gwabho gwa shilangaya. ¹³ Na bhenebho bhashinkututapula mmashili ga lub-hindu, nikutushoya na kutujinjiya muupalume uka mwana gwabho jubhakumpinga. ¹⁴ Kwa bhenebho tunagombolwa, nileshelelwa yambi yetu.

A Kilishitu na Liengo Lyabho

¹⁵ Na a Kilishitu ni shilanda shibhoneka, sha a Nnungu bhakaabphoneka,
nantando jwa indu yowe ipengenywe.

¹⁶ Pabha indu yowe ishipanganywa kupitila
Bhenebho,
kila shindu sha kunnungu na sha pa shilam-bolyo,
indu ibhoneka na ikaabhoneka,
ibhaga ashinanndenga, na majini na ashimaoka
bhowe.
Yowe puipengenywe na Bhenebho na kwa
ligongo lyabho.

¹⁷ Bhenebho bhaapali indu yowe ikanabhe
pagwa,

yowe inatama ukoto kwa lundana na bhenebho.

¹⁸ Bhenebho ni akalongolele bha likanisha, ma-linga ntwe shiukuti longolela shiilu,
numbe bhenebho ni shiumilo sha gumi gwa
shene shiilusho.

Bhenebho ni nantando bha gumi,

bhantai kuyuka bhakaweje,
nkupinga bhabhe bha ntai kwa indu yowe.

¹⁹ Pabha a Nnungu bhashipinga kutimilla kwabho kowe kutame mubhanabhabho a Yeshu.

²⁰ Na kwa bhana bhabho, a Nnungu bhayene bhashilundanywa na indu yowe, kwa shiwo sha a Yeshu munshalabha, a Nnungu gubhatendile ulele na indu yowe, ibhe ya pa shilambolyo eu ya kunnungu.

²¹ Mmanganyanji bhukala mwashinkutalikanganana na a Nnungu nibha magongo, kwa ligongo lya ng'aniyo yenunji na itendi yenunji ya nyata. ²² Ikabheje nnaino, kwa shiwo shika mwana gwabho atemi pa shilambolyo pano, a Nnungu bhashikunnundanyanga, nkupinga bhammikanje pamo na bhenebho, nninginji bha ukonjelo na bhammbonenji na wala sha gambwa, ²³ ikabheje nnapinjikwanga kwiishimilika ukoto nngulupai, wala nnakundanje kutendebhuywa nikunshoyanga nngulupai im-patilenje pumwapilikenenje Ngani ja Mmbone. Nne a Pauli ni ntumishi jwa jene Ngani ja Mmbone, jilungwiwe pa shilambolyojo.

Liengo lya a Pauli Mmakanisha

²⁴ Nnaino ngunaangalila kupotekwa kwangu kwa ligongo lyenunji, pabha ngunagumbashiya pashiilu shangu indu itubhile mmboteko ya a Kilishitu kwa ligongo lya likanisha, lili shiilu shabho. ²⁵ Nne njibha ntumishi jwa likanisha malinga shibhapanje a Nnungu kumba,

kwa pwaida jenunji. Nunguye lilobhe lyabho gwangali leka shindu,²⁶ indu ya nng'yo ibhaishiywenje bhandu bhowe kuumila bhukala, ikabheje nnaino bhashikwaibhulilanga bhandunji bhabho bha ukonjelo.²⁷ A Nnungu bhashinkupinga kwaibhulilanga bhanganyabho ga ukonjelo nkulu gwa gwene nng'iyogo, kubhandunji bhalinginji nngabha Bhayaudi. Nng'yo gwene ni a Kilishitu, bhalii mmitima jenunji. Na lyenelyo linalangula kuti shinkundikanywanje muukonjelo gwa a Nnungu.

²⁸ Kwa lyene ligongolyo, tunakwalunguya a Kilishitu kubhandu bhowe, kwaaleyanga na kwaajiganyanga bhandu bhowe kwa lunda lowe, nkupinga tunnjiyenajo kila mundu kwa a Nnungu ali aishimilishe nkulundana na a Kilishitu. ²⁹ Kwa ligongo lyolyo, nne ngunalajilila tenda liengo, kwa mashili gungupegwa na a Kilishitu gakamula liengo muntima gwangu.

2

¹ Ngunapinga mmumanyanje, shinguti lajilila kutenda liengo kwa ligongo lyenunji, na kwa ligongo lya bhandunji bha ku Laodikia na kwa ligongo lya bhowe bhakanabhe monanga mmeyo bhala. ² Ngunatenda nnei nkupinga bhatagwanje ntima na bhalundananje nkupingana, bhaumanyanje utajili gowe gwa kuimanya ukoto indu ya kweli. Nkupinga bhai manyanje kaje ya nng'yo gwa a Nnungu, yani a Kilishitu bhayene. ³ Kwa bhenebho ishikwiya ibhiko yowe ya lunda na lumanyio.

⁴ Bhai, ngunakummalanjilanga genega, nkupinga mundu jojowe ananntembanje kwa malobhe ga unami, nkali ganonye. ⁵ Pabha, nkali nkamonanje kwa meyo, ikabheje kwa muntima puni na mmanganyanji, nguliangalala nkummonanga shinkuti tamangana ukoto, na kwiishimilika nngulupai jenunji nkulundana na a Kilishitu.

Ndamo Nkulundana na a Yesu

⁶ Bhai, shimwaaposhelenje a Yesu Kilishitu kubha Bhakulungwa bhenunji, bhai ntamangananje nneyo peyo nkulundana nabho. ⁷ Ntamangananje ukoto nkulundana na bhenebho na shengwa panani jabho, na kwiishimilika nngulupai malinga shinnejigenyenje, na mpundanje kutenda eja.

⁸ Bhai mwiiteiganje, mundu anantembanje kwa lumanyio lwakwe lwa unami, lwa poshela kubhandu na majiganyo ga pa shilambolyo, gali nngabha ga a Kilishitu! ⁹ Pabha kukamilika kowe kwa a Nnungu, kwabhoneshe mwa a Kilishitu nshiilu shabho, ¹⁰ na mmanganyanji nshipegwanga gumi gwa nng'ilimila nkulundana na bhenebho, bhali bhakulungwa bha mashili na ukulungwa gowe.

¹¹ Nkulundana na a Kilishitu mmanganyanji nnjalwikenje, numbe nngabha kwa tagwa na bhandu, ikabheje na a Kilishitu bhayene, nkgombolwa kopoka kushiilu shangali mashili. ¹² Pabha, nkabhatishwanjeje mwashinkushikwanga pamo na a Kilishitu, na yuywa pamo na

bhenebho kwa kulupalila mashili ga a Nnungu, bhaayushiye a Kilishitu bhakaweje.

¹³ Na mmanganyanji pumwalinginji nng'wilenje, kwa ligongo lya yambi yenunji na gwangajaluka gwenunji. Ikabheje nnaino a Nnungu bhashikumpanganga gumi pamo na a Kilishitu, nikutuleshelela yambi yetu yowe, ¹⁴ gubhaputile malobhe gajandikwe ga kutulugula, na ukumu jakwe nikujishoya jinapagwe kabhili, kwa kujikomela munshalabha. ¹⁵ Gubhaapokonyolenje ukulungwa na mashili gabhonji bhakulungwanji na bhakwetenje mashili ga kumaoka, nikwatokomayanga palugwinjili akuno bhaliangalala pa lugwinjili lwa bhandu pa nshalabha gwa a Yeshu.

¹⁶ Kwa nneyo, bhai, mundu ananng'ukumulanje kwa ligongo lya shalya, eu ya papila, eu kwa ligongo lya shikukuu, eu ga mwei gwa ambi, eu ga lyubha lya pumulila. ¹⁷ Pabha yeneyo ni ilanda ya indu ikwiya, ikabhe shindu ukoto, ni a Kilishitu. ¹⁸ Mundu jojowe ananng'ukumulanje, alikiitemba kwiiitimalika akuno ali kwaatindibhalila ashimalaika. Mundu malinga jwenejo anakagulila agamii yakwe, alikiitapa kwa lunda lwake lwa shigundu, ¹⁹ jwene mundujo ashikwaaleka a Kilishitu bhalilntwe gwa shiilusho. Nkulongoywa na a Kilishitu, shiilu showe shinaliywa na lundanywa pamo kwa ibhalo na minanga jakwe, penepo shiilu shinakula, malinga shibhapinga a Nnungu.

Maleyo ga Bhaajiganya bha Unami

²⁰ Bhai, ibhaga mmanganyanji mwashinkuwanganga pamo na a Kilishitu na gombolwa mmashili ga bhaatagwala bha pa shilambolyo, bhai, kwa nndi tama kabhili mbuti bhandu bha pa shilambolyo, nnibhishilwanga ibhagu? ²¹ “Eti nnakamulanje ashi, eu nnapayanje ashi, eu nnakwayanje ashi!” ²² Gene gowego ni ga indu ya angabhanika, gali malajilo na majiganyo ga bhandunjipe. ²³ Yeneyo puibhoneka mbuti ya lunda kwa namuna ja tindibhalila jimwiibhishilenje mwashaayenenji, nkwiitimalika na nkushipoteka shiilu na ilokoli yakwe, ikabheje ikapwaa shindu nkulekaya ilokoli ya shiilu.

3

¹ Bhai monaga nnyushiywenje pamo na a Kilishitu, mwiloleyanje indu ya kunani kubhali a Kilishitu, numbe bhashitama kunkono nnilo gwa a Nnungu. ² Mwiganishayanje indu ya kunani, nngabha indu ya pa shilambolyo pano. ³ Pabha mwawilenje, na gumi gwenuunji ushiiywa pamo na a Kilishitu kwa a Nnungu. ⁴ Pushibhabhoneshe a Kilishitu bhali gumi gwetu, penepo shimmonekanje pamo na bhenebho, muukonjelo.

Ndamo ja Bhukala na ja Nnaino

⁵ Bhai, ibhalo yenunji inalame nkulokolila indu ya pashilambolyo, malinga kulabhalabha na indu ya nyata na ilokoli ya nyata na ng'aniyo yangali ya mmbone, pabha kutenda yeneyo ni malinga kutindibhalila yanamu. ⁶ Kwa

ligongo ly a genego, nnjimwa ja a Nnungu ji-nakwiya. ⁷ Nkali mmanganyanji bhukala mwa-temingenenje nndamo ja tenda yene induyo.

⁸ Ikabheje nnaino mmanganyanji nnapinjik-wanga kuileka yoweyo, nnjimwa, na ilokoli, na ilebho na kulosha na matukano, ganakoposhe nkang'wa yenunji. ⁹ Nnabhalanjilanjanje ya unami, pabha nng'ulilenje gundu gwa bhukala na itendi yakwe yowe, ¹⁰ nng'wetenje gundu gwa ambi. Upunda alaywa ukoto nkwaalandia a Nnungu, nkupinga nkolanje lunda lwa kwaamanya bhayene bhaapanganya. ¹¹ Penepo shakwa sha lugula kabhili kuti abha, Bhayaudi eu Bhagiliki eu ajalwishe na jwangajaluka, nngumba wala jwampenye, ntumwa wala nng-wana, ikabhe a Kilishitu ni yowe, na kwa kila shindu.

¹² Bhai pabha nshibhanganga bhandu nng'agwilwenje na a Nnungu, bha ukonjelo nkupingwanga, ntolanje ntima gwa shiya na uguja na kwiitimalika na shinunu na kwiiluma. ¹³ Nnaukumulane nneshelelanjanje, mundu akolaga shiumilo sha kunnugula nnjakwe, bhai mbaya anneshelele malinga Bhakulungwa shibhanneshelelenje mmanganyanji. ¹⁴ Kupunda gene gowego, ntamangananje nkupingana, pabha kupingana kunalundanya indu yowe nibha shindu shimo sha nng'ilimila. ¹⁵ Na ulele gwa a Kilishitu gunnongoyanje mitima jenunji, pabha genego ni gunshemelwenje kubha shiilu shimo. Na mmanganje bhandunji bhatendanga ejia.

¹⁶ Malobhe ga ngani ja a Kilishitu gagumbale mmitima jenunji, akuno nnijiganyananga na leyana kwa lunda lowe, nnikwaajimbilanga a Nnungu nyimbo ya mbeembela na nyimbo ya muntima, akuno nnitendanga eja mmitima jenunji. ¹⁷ Shoshowe shinkukamulanga kwa lilobhe eu itendi, yowe ntendanje kwa lina lya Bhakulungwa a Yeshu, na kwaatendela eja Atati a Nnungu kwa lina lya a Yeshu.

Majiganyo ga Nndamo ja Nnikaja

¹⁸ Mmandonyanji mwaapilikanilanje ashimbuje bhenunji, nneyo ni shibhapinga Bhakulungwa. ¹⁹ Mmanabhalume nnombilenje, mwaapinganje ashakongo bhenunji, nnakolanje nngomo.

²⁰ Bhana, mwaapilikanilanje bhankwetenje kwa kila shindu, pabha genego ni gubhapinga Bhakulungwa.

²¹ Na mmanganyanji ashaaina mundu, nnaatandubhanje ashibhana bhenunji, bhanawanganga mitima.

²² Bhatumwa, mwaapilikanilanje bhakulungwa bhenunji bha pa shilambolyo pano, kwa kila shindu na nngabha kwa jimililwape nkupinga muikonjeleyanje pa meyo gabhonji, ikabheje ntendanje nneyo kwa ntima gwa mmbone, akuno nnikwaajogopanga a Nnungu.

²³ Shoshowe shinkukamulanga, ntendanje kwa ntima gowe mbuti nkwaatendelanga Bhakulungwa na wala nngabha mundu.

²⁴ Mmumanyanje kuti shimposhelanje upo ya ulishi ibhammishilenje Bhakulungwa. Pabha

nnakwaatumishilanga Bhakulungwa a Kilishitu.
 25 Pabha atenda yangali ya mmbone shalipwe
 yangali ya mmbone malinga shatendile, pabha
 kwa a Nnungu kwangali bhonelwaa.

4

¹ Bhakulungwanji bha bhatumwa, mwaatendelanje bhatumwa bhenunji aki na uguja,
 nnikumumanyanga kuti, nkali mmanganyanji
 nkwetenje Bhakulungwa kunnungu.

Malajilo

² Nnonjeyanje kaje nkujuga nnaiibhukanje, na
 mwaatendelanje eja a Nnungu. ³ Ntujujilanje
 na uwe, nkupinga a Nnungu bhatupe malanga
 ga lunguya lilibhe lyabho, tushumye indu ya
 nng'ijo ya a Kilishitu, numbe kwa ligongo lya
 yeneyo, nne njitabhwa. ⁴ Kwa nneyo nnyujilanje
 kupinga ngombole kulunguya ga indu ya nng'ijo
 malinga shingupinjikwa.

⁵ Ntamangananje kwa lunda na bhandunji
 bhangalinginji ngulupai jimo na mmanganyanji,
 nnikugakamulilanga liengo ukoto, malanga
 gumpegwilwenje. ⁶ Mobha gowe malobhe
 genunji ganapinjikwa gabhe ga mboka, na
 ga pwaa, nkupinga mmumanyanje namuna ja
 kunnjangula kila mundu.

Shalamu ya Kumpelo

⁷ A Tikiko, apwetu bha mmbone, bhatumihi bha kulupalika na ajangu nniengo lya
 Bhakulungwa, shibhantashiyanje ngani jangu
 nne jowe. ⁸ Njikwaatuma kweneko kwa ligongo
 lya genego, nkupinga nngamanyanje getu uwe,

na bhantaganje ntima. ⁹ Bhanakwiya pamo na a Oneshimushi apwetu bha mmbone na bha kulupalika, numbe ni bhashilambo ajenunji. Bhene bhanganyabho shibhantalashiyane indu yowe itendeka kunngwetu kuno.

¹⁰ A Alishitako bhatabhilwe pamo na nne, bhanakunnjumushilanga, pamo na a Maliko aibhani bhabho a Bhanabha, bhumwaposhelanjje malajilo ga bhenebho, bhaikaga kweneko mwaaposhelanje. ¹¹ Na a Yoshua bhaashemwa a Yushitushi, nneila peila bhanakunnjumushilanga, bhene bhanganya pebha ni bhalinginji Bhayaudi, munkumbi gwa bhaakamulanga maengo pamo na nne, kwa ligongo lya upalume gwa a Nnungu, na bhashindaganga ntima kwa kaje.

¹² A Epapula bhashilambo ajenunji na bhatumishi bha a Yeshu Kilishitu bhanakunnjumushilanga, mobha gowe bhanakunjilanga gwangali totoshela, nkupinga ntamangananje kwa kamilika, na nkombolanje kwa kaje kutenda yowe ipinjikwa na a Nnungu. ¹³ Bhai ngunakong'ondela cuti bhanakamula liengo kwa tumbila, kwa ligongo lyenu mmanganyanji, na lya bhalinginji ku Laodikia na bhalinginji ku Ilapolishi. ¹⁴ Ambwiga ajetu a Luka a dakitali bhala, na a Dema bhanakunnjumushilanga.

¹⁵ Mwaajumushilanje ashaapwetu bha ku Laodikia na a Nimpa na bhandunji bha likanisha bhaimananga nnyumba jabho. ¹⁶ Jene bhaluwa jino jishomwaga na mmanganyanji, mwaapanganje na bha likanisha lya ku Laodikia bhajishomanje, na mmanganyanji

nshomanje bhaluwa ja kopoka ku Laodikia.
¹⁷ Mwaabhalanjilanje a Alikipo, bhatende ukoto nkukamilisha liengo libhapegwilwe na Bhakulungwa.

¹⁸ Nne a Pauli, ngujandika shene shalamu shino kwa nkono gwangu. Nkumbushilanje kuti muni nkutabhwa. Nema ya a Nnunu ibhe na mmanganyanji.

**Malagano ga Ambi
Mwera: Malagano ga Ambi (Bible)**

copyright © 2019 Pioneer Bible Translators

Language: Mwera

Contributor: Pioneer Bible Translators

For more information, visit pioneerbible.org or twftw.org

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 11 Nov 2022 from source files dated 29 Jan 2022

51d0a6af-6aed-51c3-a228-0eefcc772d84